

**Sud Bosne i Hercegovine**
Суд Босне и Херцеговине**Broj: S1 3 Iž 030990 18 Iž**
Sarajevo, 06.11.2018.godine**IZVORNİK**

Sud Bosne i Hercegovine u Sarajevu, u apelacionom vijeću sastavljenom od sudija Dinke Bešlagić-Čovrk, kao predsjednika vijeća, Mirsade Džindo i dr Branko Morait, kao članova vijeća, odlučujući o žalbi žalitelja Ante Džaje, ul.Kneza Trpimira bb, Livno, izjavljenoj na Zaključak Centralne izborne komisije Bosne i Hercegovine, broj : 05-1-07-1-1274-37/18 od 01.11.2018. godine, u nejavnoj sjednici, održanoj dana 06.11.2018. godine, donio je

R J E Š E N J E**Žalba se odbija .****O b r a z l o Ź e n j e**

Zaključkom Centralne izborne komisije BiH (u daljem: CIK BiH), odbačena je žalba žalitelja iz razloga što je utvrđeno da je ista podnešena od neovlaštenog lica.

Protiv ove odluke žalitelj je uložio žalbu u kojoj ističe da nije podnio žalbu kao ovlaštenu predstavnik političke stranke već isključivo kao direktno zainteresirana strana i kandidat koji je oštećen odlukom o izmjeni odluke broj : 05-1-07-1-1274-1/18 od 22.10.2018. godine o utvrđivanju i objavljivanju rezultata Općih izbora u Bosni i Hercegovini 2018. godine , broj : 05-1-07-1-1274-22/18 od 29.10.2018. godine, te traži da se izvrši ponovno brojanje u osnovnoj izbornoj jedinici Livno na biračkim mjestima 106A001A, 106A002A, 106A010, 106A015, 106A016 i 106A025.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci, jer nije podnesena od ovlaštene osobe ili da se odbije kao neosnovana .

Nakon što je ispitalo pobijani zaključak vijeće Apelacionog odjeljenja Suda Bosne i Hercegovine je zaključilo:

Žalba nije osnovana.

U konkretnom slučaju CIK BiH je utvrdila da je žalba žalitelja Ante Džaje, kao kandidata HDZ 1990 za nivo Skupštine kantona u FBiH, Izborna jedinica 10, izjavljena na Odluku o izmjenama Odluke o utvrđivanju i objavi rezultata Općih izbora 2018. godine broj : 05-1-07-1274-1/18 od 22.10.2018. godine nedopuštena, nalazeći da isti nije ovlašten za podnošenje žalbe, te je iz razloga predviđenih članom 4.25 Izbornog zakona, na osnovu člana 6.6. stav (4) Izbornog zakona BiH odbacila.

Ovakva odluka je pravilna i na Zakonu zasnovana.

Odredbom člana 5.30. stav (1) Izbornog zakona BiH je predviđeno da, nakon što CIK BiH utvrdi i objavi izborne rezultate, Općinska izborna komisija, ovjerena politička stranka, koalicija, lista nezavisnih kandidata ili nezavisni kandidat mogu zahtijevati da CIK BiH ponovo broji glasačke listiće u određenim izbornim jedinicama u kojima su se politička stranka, koalicija, lista nezavisnih kandidata ili nezavisni kandidat kandidirali za izbore. Nadalje je predviđeno da akreditirani posmatrač može zahtijevati da CIK BiH ponovno broji glasačke listiće na biračkom mjestu na kojem je bio posmatrač. Ovjerena politička stranka, koalicija, lista nezavisnih kandidata, nezavisni kandidat ili akreditirani posmatrač mogu zahtijevati od CIK BiH da ponovno broji glasačke listiće, za glasanje u odsutnosti, glasačke listiće kojima se glasalo izvan Bosne i Hercegovine, ili ne potvrđene kovertirane glasačke listiće.

Iz navedene odredbe jasno proizilazi da žalitelj, u svojstvu kandidata HDZ 1990 godine, nespada u krug lica koja su navedenom odredbom ovlaštena da podnesu zahtjev da CIK BiH ponovno broji glasačke listiće u određenim izbornim jedinicama.

Žalitelj se pogrešno poziva na odredbu člana 6.2. Izbornog zakona BiH kada smatra da mu navedena odredba daje legitimaciju za izjavljivanje žalbe u konkretnom slučaju, jer navedena odredba jasno propisuje ko ima pravo u izbornom periodu i u kom roku uložiti prigovor, dakle, ova odredba nije relevantna u konkretnom slučaju, jer se žaliteljev zahtjev iz žalbe od 31.10.2018. godine odnosio na ponovno brojanje glasačkih listića, koja situacija je regulisana članom 5.30 stav (1). Izbornog zakona BiH .

Sve i da jeste relevantna odredba člana 6.2. Izbornog zakona BiH, kako to smatra žalitelj, ova odredba istom nebi mogla dati legitimaciju za podnošenje žalbe u konkretnom slučaju, jer je stavom (1) iste propisano da „birač i politički subjekt čije je pravo ustanovljeno zakonom povrijeđeno može izbornoj komisiji uložiti prigovor najkasnije u roku od 48 sati, odnosno u roku od 24 sata u izbornom periodu od učinjene povrede, osim ako ovim zakonom nije drugačije određeno“ .

Odredbom čl. 78. Zakona o upravnim sporovima BiH („Sl. Glasnik BiH br. 19/02 , 88/07, 83/08, 74/10) propisano je da žalbu iz člana 76. i 77. tog zakona (u tim članovima navedeno je protiv kojih se odluka Izborne komisije BiH ili Izbornog vijeća za prigovore i žalbe te Brčko Distrikta BiH, može izjaviti žalba i ko o žalbi odlučuje) može uložiti svaka osoba, politička stranka ili koalicija čije je pravo, utemeljeno Izbornim zakonom i propisima koji donosi Izborna komisija BiH na temelju zakona, povrijeđeno ili koja ima određen pravni interes. Iste odredbe sadržane su i u članu 6.2 i 6.3. Izbornog zakona BiH („Sl. glasnik BiH br. 23/01, 7/02, 9/02, 20/02, 25/02, 4/04, 20/04 i 31/16), kojim je propisano da (radi zaštite izbornog prava) svaka osoba, politička stranka ili koalicija koja ima pravni interes ili čije je pravo, ustanovljeno tim zakonom, povrijeđeno može uložiti prigovor (žalbu).

Članom 1.1.a. Izbornog zakona BiH, kojim je precizirano šta znače pojedini izrazi korišteni u ovom zakonu, u stavu 1) je precizirano da „politički subjekt“ podrazumijeva političku stranku, nezavisnog kandidata, koaliciju ili listu nezavisnih kandidata, ovjerenu za učešće na izborima u skladu sa ovim zakonom.

Dakle, žalitelju ne pripada pravo na podnošenje žalbe koja je odbačena pobijanim Zaključkom CIK BiH od 01.10.2018. godine ni iz jednog navedenog razloga.

Kod ovakvog utvrđenja, ovo vijeće se nije upuštalo u dalje ocjene vezane za pitanje blagovremenosti i osnovanosti žalbe koja je odbačena Zaključkom CIK BiH od 01.11.2018. godine.

U konkretnom slučaju pobijani zaključak CIK BiH je donesen pravilnom primjenom navedenih odredaba Izbornog zakona BiH („Sl.glasnik broj : 23/01 do 31/16).

Iz navedenih razloga Apelaciono upravno vijeće – Apelacionog odjeljenja Suda Bosne i Hercegovine nalazi da je pobijani zaključak CIK BiH pravilan i zakonit, a žalba neosnovana, pa je istu, primjenom odredbom člana 81. stav 1. Zakona o upravnim sporovima Bosne i Hercegovine („Službeni glasnik broj: 19/02 do 74/10) valjalo odbiti.

Predsjednik vijeća
Sudija
Dinka Bešlagić- Čovrk